

Jems ndê bapia Yom whê bapia dindec sa-nga

Ŋamalac naŋ to bapia dindec, naŋ ndê ŋaê Jems. Iŋ ŋac bata naŋ yob lau sêkêŋ whiŋ Yisu-nga naŋ sêndôc malac Jerusalem (Apo 15:13). Lau tiguauc daêsam gauc gêm bu Jems iŋ Pômdau Yisu asi (Mak 6:3).

Jems to bapia dindec têŋ lau sêkêŋ whiŋ Yisu Kilisi-nga naŋ sêndôc babalip yêc lau naŋ lau Israel dom, naŋ si gameŋ. Iŋ sam ŋac bu lau naŋ sêsa akêŋ gôlôwac Israel-nga si toŋ 12 (1:1), ma bocdinaŋ lau ŋatô gauc gêm bu mboe iŋ to bapia dindec têŋ lau Israel-nga naŋ sêlhô su yêc malac Jerusalem têŋ ndoc lau sêkêŋ kisa ŋac (Apo 8:1; 11:19). Ma lau ŋatô gauc gêm bu bapia dindec gic waê lau sêkêŋ whiŋ-nga hoŋ, lau Israel-nga, ma lau gameŋ apa-nga sêwhiŋ.

Iŋ ndê bapia dau hêganôŋ lêŋ ti sakiŋ ŋayham naŋ gic lau sêkêŋ whiŋ-nga ŋawaê. Iŋ bu kêŋ puc ŋac bu sêtôc si sêkêŋ whiŋ ŋandô tiawê, ma bu sêhu mêtê sac-sac hoŋ siŋ. Jems bu tôc asê bu lau si sêkêŋ whiŋ iŋ gêŋ naŋ sêsôm ŋa whasuŋ ŋambwa dom, magoc lau naŋ sêkêŋ whiŋ ŋandô, naŋ si lêŋ ti sakiŋ oc tôc gêŋ dau asê tiawê.

Jems gic hu ndê bapia

¹ Aö Jems nañ gam akiñ Anötö lu Pômdau Yisu Kilisi, gato yom dindec têt mac lau akêñ whiñ Yisu-nga, nañ asa akêñ gôlôwac Israel-nga ton 12, mac lau nañ andöc babalip yêc lau apa si gameñ. Acsalô têt mac hoñ.

Dahôc ñawapac ti atac lu-lu dom

² O aneñ asidôwai. Gêñ wapac me létôm bu tap mac sa, nañ alic nditôm gêñ atac ñayham-nga. ³ Mac añyalê bu gêñ bocke nañ kêsahê mac nem akêñ whiñ, nañ gêm mac sa bu alhac ñaŋga. ⁴ Ma mac bu ati lau alhac ñaŋga-nga, dec oc ndic dabiñ mac atôm gwalam akwa akêñ whiñ-nga, ma mac oc apônda gêñ dañ dom. ⁵ Magoc mac nem asa bu pônda gauc, nañ teñ Anötö bu kêt gauc têt am, ma iñ oc kêt. Bu Anötö iñ mwasiñ ñadau, ma oc lic ñamalac nañ teñ gêñ têt iñ, nañ sac dom, iñ oc kêt gêñ têt iñ ti atac whiñ. ⁶ Magoc têt ndoc am teñ gêñ dau, nañ teñ ti atac lu-lu dom. Teñ ti kêt whiñ bu am oc tap ñandô sa. Asa nañ teñ gêñ ti atac lu-lu, nañ gitôm gwêc nañ mbu gêli sa ma pi sip ñapañ. ⁷ Iñ ñamalac kaiñ dinañ, gauc nem bu iñ oc kêt gêñ dañ yêc Pômdau dom. ⁸ Iñ ñamalac gauc lu-lu-nga, ma kôm ndê gêñ hoñ bambaliñ.

Dahê gauc pi mone ti wapa ñapañ dom

⁹ Mac asidôwai nañ lau waêm mba ma lau ñalôm sawa, aö wasôm têt mac bu atac ñayham sa, bu Pômdau gêlic mac atôm lau tiwaê tu mac nem akêñ whiñ-nga. ¹⁰ Ma mac

lau ti lêlôm, Anötö bu êngwiniņ mac, goc atac ņayham sa. Ahê gauc pi mac nem mone ti wapa dom. Bu gêņ dau oc niņga gitôm a ņamlha ņayham, naņ ¹¹ ac pi ti ņandê atu, ma pec e ņamlha kêsôlô, dec ņamlha ņayham dau pacndê. Ma ņalêņ tigen, lau ti lêlôm naņ sem gwelen ņapaņ tu sêtap mone sa-ņga, naņ oc sêniņga bocdinaņ.

Lêlôm ti saê

¹² Asa naņ bu lhac ņaņga têņ ndoc iņ kêsahê lêtôm ti saê, naņ oc tap Anötö ndê mwasiņ sa, bu ņawapac dau kôm iņ hu ndê kêņ whiņ siņ dom, ma Anötö oc kêņ iņ ndöc tali ņapaņ. ņaôli dau dinaņ Anötö gic bata su bu kêņ têņ lau naņ atac whiņ iņ naņ.

¹³ ņamalac daņ bu lêtôm tap iņ sa, naņ hê gauc bu Anötö kêņ lêtôm têņ iņ lec dom. Bu gêņ daņ gitôm dom bu êntôm Anötö, ma Anötö dau kêtôm ņamalac daņ dom. ¹⁴ Mba! Lêtôm ņahu sip ņamalac dau ndê atac galac, naņ kêņ gauc têņ iņ ma kêtôm iņ bu kôm sac. ¹⁵ Ma ņamalac naņ sôc atac galac ņapu, naņ kôm mêtê sac. Ma ņamalac naņ kôm mêtê sac, naņ wêkaiņ seņ mbac ndu-ņga.

¹⁶ Bocdinaņ aneņ asidôwai atac whiņ-ņga, ayob daôm bu lau daņ sêņsau mac dom. Lêtôm meņ akêņ Anötö dom. Mba! ¹⁷ Damaņ undambê-ņga, naņ kêņ ņawê hoņ sêlhac um-boņ, naņ mwasiņ ņayham hoņ ņadau, ma gêņ ņayham hoņ naņ datap sa, naņ meņ akêņ iņ ndê. Tôm bêc hoņ ac pi ma sip tiyham, ma ac ņa-ayuņ yêc teņ dom. Magoc Anötö gitôm

ac ɲa-ayun dom. In kôm gêɲ ɲayham eɲ tu êmwasiɲ yac-ɲga, ma kac ndê awha kwi-kwi dom. ¹⁸ Ma in kên in ndê yom ɲandô sip yac neɲ ɲalôm tu bu kôm yac dati lau wakuc, datôm gêɲ hoɲ naɲ in kên, naɲ si ɲandô mbêc.

Daɲgô mêtê ti dakôm ɲandô sa

¹⁹ O aneɲ asidôwai atac whin-ɲga, aɲgô su naɲ. Atisa ɲagahô tu asôm daôm nem yom-ɲga dom, magoc akên daɲam lau ɲatô si yom ɲapep muɲ. Ma ayob daôm bu atac ɲandê ɲagahô dom. ²⁰ Bu ɲamalac si atac ɲandê kalhac ɲac ahuc e sêso lêɲ gitêɲ naɲ Anötö tac whin. ²¹ Tu dinaɲ-ɲga dec aô wasôm têt mac bu mêtê ɲadômbwi ma mêtê sac hoɲ naɲ kêsôwec tiatu yêc gameɲ nom-ɲga, naɲ ahu siɲ! Aɲgwiniɲ daôm ma akôm Anötö ndê mêtê naɲ sic dulu têt mac su, naɲ sa sip nem ɲalôm e tidôn, bu yom dau gitôm bu nem mac si.

²² Mac bu aɲgô Anötö ndê yom ɲambwa, dec oc aɲsau daôm. Aɲgô ma akôm ɲandô sa! ²³ Asa naɲ ɲgô mêtê magoc kôm ɲandô sa dom, naɲ gitôm ɲamalac naɲ tôc gwaniɲ sip busunôm bu lic dau aɲgô andô. ²⁴ In gêlic su, goc sa gi ma ɲagahô kêlhin aɲgô andô siɲ. ²⁵ Magoc asa naɲ tôc gwaniɲ Anötö ndê yomsu

ɲandô* naɲ kɛgapwêc yac su yêc mêtê sac, ma sôc ɲapu ti gauc gêm ɲapan, naɲ Anötö oc nem mbec gêɲ hoɲ naɲ iɲ kôm.

²⁶ Asa naɲ gauc gêm bu iɲ gêm akiɲ Anötö ɲapep, magoc gêm gôliɲ dau ndê êmbala dom, naɲ kêsau dau. Ma gêɲ hoɲ naɲ iɲ kôm bu nem akiɲ Anötö, naɲ gitôm gêɲ ɲambwa ma gic Anötö tandô ɲayham dom. ²⁷ Mac bu anem akiɲ Anötö ɲalêɲ gitêɲ naɲ iɲ oc lic ɲayham, goc akôm gêɲ bocdec. Anem mosibu ti lauwhê sawa naɲ sêhóc ɲawapac, naɲ sa. Ma ambo ahê têɲ mêtê ɲadômbwi nom-ɲga hoɲ.

2

Datoc lau hoɲ sa

¹ O aneɲ asidôwai, mac naɲ akêɲ whiɲ yac neɲ ɲawasi ɲadau Pômdau Yisu Kilisi. Atoc lau tiwaê ma lau waêmbe hoɲ sa ɲalêɲ tigeɲ.

² Mboe mac akac daôm sa tu alic om-ɲga, ma ɲamalac lu sêsôc sêmeɲ. Ʋgac daɲ sôc ɲakwê ɲawasi ti gôlôn gol, magoc ɲgac daɲ iɲ ɲgac ɲalôm sawa naɲ sôc ɲakwê akwa gwelen-ɲga.

³ Mac oc akôm sake? Mboe mac oc atoc ɲgac ti ɲakwê ɲawasi sa, ma asôm têɲ iɲ bu, “Am

* **1:25** Ʋgac naɲ to Hibru tôc asê bu yomsu amaɲlu gitôm dom bu ndic dabiɲ lau bu sêti lau gitêɲ (7:19; 10:1). Bocdinaɲ lau daêsam gauc gêm bu yom naɲ Jems to pi Anötö ndê yomsu ɲandô, naɲ hêganôn yomsu amaɲlu dom, magoc hêganôn ɲawaê ɲayham. Bu ɲawaê ɲayham whê sa bu Yisu gic dabiɲ yomsu pwac akwa-ɲga hoɲ (Mat 5:17) ô yac, ma Ʋjalau Dabuɲ gêm gôliɲ lau sêkêɲ whiɲ-ɲga ma gêm ɲac sa bu sêsa lêɲ gitêɲ tôm yomsu sôm (Rom 8:2-4).

ndöc pôn ñayham dindec,” a? Ma asôm têt ñgac ñalôm sawa, “Am lhac ñambu-ñga dê,” me “Ndöc nom dindec yêc yac gahiñ-ñga,” a? ⁴ Mac bu akôm bocdinañ ma atoc mac nem lau ñatô sa hóc gêlêc lau ñatô su, dec mac atôm lau sêmatôc yom-ñga nañ si gauc tisac.

⁵ O aneñ asidôwai atac whiñ-ñga, añgô su nañ. Lau nañ lau nom-ñga sêlic bu lau ñalôm sawa, nañ Anötö tac whiñ bu ênyaliñ ñac sa bu sêkêñ whiñ ñañga, dec sêti lau ti lêlôm yêc iñ añgô-ñga. Ma iñ oc kêt ñac sêwêkaiñ gameñ undambê-ñga nañ iñ gic bata bu kêt têt lau nañ atac whiñ iñ. Yom dau iñ yom ñandô. ⁶ Magoc mac apu lau ñalôm sawa. Ma lau ti lêlôm nañ mac atoc ñac sa, nañ sêtoc mac sa ô dom. Ñac sêlic ñayham bu sêñgwiniñ mac, ma ñac bu sêtap yom dañ sa pi mac, dec ñac oc sêwê mac atêñ lau sêmatôc yom-ñga andi. ⁷ Yomandô! Ma têt ndoc lau dau sêñgwiniñ mac, nañ sêpu mac nem ñadau ndê ñaê ñayham whiñ.

⁸ Anötö ndê yomsu nañ sêto yêc bocdec bu, “Atac whiñ lau meñpañ am-ñga gitôm mac atac whiñ daôm,” nañ tiñamata yomsu hoñ nañ sêhêganôn ñamalac si lêt sêmbo sêwhiñ dandi-ñga ma piñ ñac hoñ dôn sêpitigeñ. Mac bu dañam wambu yomsu dau, dec mac oc atoc nem asidôwai sa ñapep. ⁹ Magoc mac bu atoc lau tiwaê sa ma apu lau waêmbe, dec mac akôm sac, ma yomsu dau kêmatôc mac, ma tôc asê bu mac lau añgili yomsu-ñga. ¹⁰ Aô wasôm têt mac, bu asa nañ dañga wambu

yomsu hoŋ ɲapep, magoc kɛgìlì yomsu ɲalhô atêc daŋ, naŋ gitôm ɲamalac naŋ kɛgìlì yomsu hoŋ. ¹¹ Anötö dau kɛŋ yomsu daŋ bocdec, 'I' "Kôm gɛŋ mockaiŋ-ɲga dom," ma kɛŋ daŋ tiyham bocdec, 'I' "Ndic ɲamalac ndu dom." Am bu kôm mêtê mockaiŋ-ɲga dom, tigeŋ am bu ndic ɲamalac daŋ ndu, naŋ dec am gitôm ɲamalac kɛgìlì yomsu hoŋ-ɲga.

¹² Mac aŋyalê su bu ɲasawa sauŋ Anötö oc êŋsahê mac, êŋkuc yomsu naŋ iŋ kɛŋ bu êŋgapwêc yac su. Bocdinaŋ dec asôm yom ti akôm nem mêtê hoŋ ɲapep eŋ. ¹³ Mac bu tamwalô lau dom, dec Anötö oc tawalô mac dom tɛŋ iŋ ndê bɛc matôc-ɲga. Tamwalô lau, ma mac oc atap iŋ ndê matôc sa dom.

Dakôm mêtê ɲayham tôc yac neŋ dakêŋ whiŋ asê

¹⁴ O aneŋ asidôwai. ɲamalac daŋ bu sôm, "Aö gakêŋ whiŋ Yisu Kilisi," magoc kôm mêtê ɲayham dom, dec iŋ ndê kɛŋ whiŋ ɲandô mba, ma oc nem iŋ si dom. ¹⁵ Mac bu alic awhê me ɲgac kɛŋ whiŋ-ɲga daŋ naŋ pônɗa ɲakwê ti gɛŋ daneŋ-ɲga, dec mac oc akôm sake? ¹⁶ Mac bu asôm tɛŋ iŋ bu, "Am ndi ti yom malô, ma oc ɲayham bu am tap nem gɛŋ daneŋ-ɲga ti ɲakwê sa," magoc akêŋ gɛŋ daŋ bu anem iŋ sa dom, dec mac nem akêŋ whiŋ oc ɲandô mbasi. ¹⁷ Bocdinaŋ, asa naŋ sôm bu iŋ kɛŋ whiŋ, magoc kôm ɲa-sakiŋ dom, naŋ ndê kɛŋ whiŋ gitôm gɛŋ batê.

¹⁸ Mboe ɲamalac daŋ oc sôm, "Aö gakêŋ whiŋ, dec gitôm," ma daŋ oc sôm bu, "Aö

gakôm mêtê ñayham, dec gitôm.” Oyaê! Am bu ñamalac nañ mêtê ñayham mbasi, dec ñalêñ bocke aõ oc wañyalé bu am kêñ whiñ ñandô? Magoc lic mêtê ñayham dec aõ gakôm gambo, oc tôc aneñ gakêñ whiñ asê têt am. ¹⁹ Bocke? Am toc daôm sa bu am kêñ whiñ bu Anötö tigeñ dê mbo, a? Aluê! Ñalau sac sêkêñ whiñ bocdinañ sêwhiñ, ma sêtöc dau ñandô!

²⁰ Am ñamalac gauc mbasi-nga! Am nem kêñ whiñ nañ mêtê ñayham mbasi, nañ ti gêt ñambwa. Gauc nem yom bocdec. ²¹ Abañ Abraham iñ bu kêñ iñ ndê atu Aisak ti da pi alta, ma tu dinañ-nga dec Anötö gêlic iñ bu ñgac gitêñ. ²² Mac hoñ alic su nañ. Abraham ndê kêñ whiñ ti iñ ndê gweleñ sêpuc dau dôñ. Ma iñ ndê gweleñ ti sakiñ gic dabiñ iñ ndê kêñ whiñ. ²³ Yom nañ sêto yêc nañ sôm bu, *“Abraham kêñ whiñ Anötö dec Anötö gêlic iñ ti ñgac gitêñ.”* Yom dau ñandô sa pi gêt nañ iñ kôm, ma Anötö dau sam Abraham bu iñ ndê silip.

²⁴ Bocdinañ mac hoñ alic! Dakêñ whiñ ñambwa kôm yac dati lau gitêñ yêc Anötö añgô-nga dom. Gêt nañ dakôm tu dañañ wambu Anötö-nga, ma yac neñ dakêñ whiñ, nañ lu-lu sêkôm yac dati lau gitêñ. ²⁵ Ma gêt dañ tiyham. Gauc nem awhê señ-nga Rahab. Iñ gêm yaom lau Israel-nga nañ sêtíp gameñ Kanan-nga, ma kêmasañ ñac si lêt bu sêlhö sêndi. Ma tu dinañ-nga Anötö gêlic iñ bu awhê gitêñ.

²⁶ Ñamalac nañ wayahô mbasi, nañ iñ gêt

batê. Ma yac bu dakêṅ whiṅ magoc dakôm mêtê ṅayham dom, dec yac neṅ dakêṅ whiṅ gitôm gêṅ batê bocdinaṅ.

3

Dayob êmbalaṅ

¹ Aneṅ asidôwai, aṅgô su naṅ! Têṅ Anötö ndê bêc êmatôc lau-ṅga, naṅ iṅ oc kip yac lau naṅ andôhôn iṅ ndê mêtê têṅ lau, naṅ sa ṅapep pi yac mba gweleṅ dau. Tu dinaṅ-ṅga mac nem asa bu ti kêdôhônwaga mêtê-ṅga, naṅ kôc gauc pi yom dau muṅ su naṅ. ² Mêtê sac kôm yac hoṅ dapeṅ ṅalêṅ daêsam. ṅamalac naṅ gitôm bu yob ndê êmbala e sôm yom so daṅ dom, naṅ ṅamalac gitêṅ, ma gitôm bu nem gôliṅ iṅ ndê ṅamlic ṅagêṅ hoṅ ṅapep.

³ Lau naṅ sêndôc hosi ṅahô, naṅ sêkêṅ ain sôc hosi whasuṅ, bu sênem gôliṅ hosi ma sêkac iṅ kwi êṅkuc ṅac si atac whiṅ. ⁴ Ma akôc gauc pi waṅ atu-tu. Mbu ṅadinda peṅ lac sac andô, magoc gôliṅ atêc dinaṅ kêṅ iṅ kêti kêkuc ṅgac gôliṅ-ṅga ndê atac whiṅ. ⁵ ṅalêṅ tigeṅ, yac êmbalaṅ iṅ gêṅ sauṅ andô daṅ yêc ṅamlic ṅagêṅ hoṅ, magoc iṅ yom datoc dauṅ sa-ṅga daêsam ṅahu. Mac aṅyalê bu ya ṅamsi sauṅ daṅ gitôm bu ti ya atu ma neṅ pwa atu daṅ su.

⁶ Ma yac êmbalaṅ dau gitôm ya. Yêc yac neṅ ṅamlic ṅagêṅ hoṅ, sac ṅahu yêc êmbalaṅ, ma yac bu dayob ṅapep dom, dec sac oc êṅsôwec e nem ṅamlic sambuc ahuc ma kôm yac neṅ têm dambo taṅli-ṅga hoṅ tisac. Ma sac naṅ ṅahu yêc êmbalaṅ, naṅ meṅ akêṅ ya lambwam-ṅga.

⁷ Lau ɲatô sêkôc bôc ti mbac ma sêyob e gêɲ dau timalô. Ma gitôm bu sêkôm mboc ma gêɲ gwêc-ɲga timalô bocdinaɲ. ⁸ Magoc lau daɲ sêtôm dom bu oc sênem malô êmbala. Bu ɲamalac êmbala iɲ gêɲ sac naɲ yêc teɲ dom, ma ɲamalic sac gêm iɲ ahuc. ⁹ Yac tam daɲge yac neɲ Pômdau ti Damaɲ undambê-ɲga ɲa êmbalaɲ, magoc ɲamalac naɲ Anötö kêmasaɲ bu sênem iɲ aɲgô sêmbo nom, naɲ yac dapucbo ɲac ɲa gêɲ tigeɲ dinaɲ. ¹⁰ Aɲgô su naɲ. Mbec ti yom sac, lu-lu sêsa akêɲ whaɲsuɲ tigeɲ. O aneɲ asidôwai, mêtê dau iɲ sac sambuc! ¹¹ Mac gauc gêm bocke? Oc tôm bu gwêc ma bu ɲayham tu danôm-ɲga lu-lu sêsa akêɲ bubata tigeɲ? Mba! ¹² O aneɲ asidôwai. Gitôm dom bu datap bu danôm-ɲga sa yêc gwêc ɲalôm. Ma gêɲ daɲ tiyham. Oc datap wa ɲandô sa yêc a kiɲ, me a kiɲ ɲandô yêc wa? Mba.

Lau tigauc sêkôm mêtê ɲayham

¹³ Mac nem asa iɲ ɲamalac tigauc, naɲ toc dau sa pi ndê gauc dom, magoc kôm mêtê ɲayham ma sa lêɲ gitêɲ eɲ, tu bu têt gêɲ dau asê. ¹⁴ Tigeɲ mac lau naɲ asa lêɲ atoc daôm sa tu ahôc gêlêc asidôwai-ɲga, me mêtê lêmuɲ-ɲga bu yêc mac nem ɲalôm, naɲ atoc daôm sa me aɲsau daôm bu mac lau tigauc lec dom. ¹⁵ Bu lau naɲ sêkôm mêtê lêmuɲ-ɲga ti mêtê sêhôt gêlêc dau-ɲga, naɲ si gauc meɲ akêɲ Anötö ndê dom. Mêtê dau ɲahu yêc nom, kêkuc ɲamalac nom-ɲga si gauc ɲambwa, ma meɲ akêɲ Sadaɲ ndê. ¹⁶ Mêtê lêmuɲ-ɲga

ti ahôc gêgêlêc daôm-nga bu yêc mac nem ñalôm, dec mac oc apiñ daôm dôñ ñapep dom, ma mêtê sac tidau-tidau oc nem mac ahuc. ¹⁷ Asa nañ kôc gauc ñayham yêc Anötö ndê, nañ gêñ ñamata-nga iñ oc kôm mêtê ñawasi eñ. Iñ oc yob dau bu tac ñandê ñagahô dom, ma iñ oc ti ñamalac atac whiñ lau ti sôc yom ñapu-nga. Iñ ñamalac tawalô lau-nga ma ndê gwelenç oc nem ñandô daêsam. Iñ oc kôm mêtê ñayham têtñ lau tiwaê ma têtñ lau waêmba sêwhiñ, ma oc êñsau lau dañ dom. ¹⁸ Lau nañ sêkôm gêñ malô ma sêhê wamba lau, nañ sêtôm lau nañ sêsô gêñ ñawhê ñayham sip si ôm. Ma ñac si gwelenç dau oc nem ñandô bu ñac ma lau daêsam sêtap lêtñ gitêtñ sa.

4

Lêtñ atac whiñ gêñ nom-nga-nga

¹ Akôc gauc pi gêñ nañ kôm mac atac ñandê ti asôm daôm. Aö wasôm têtñ mac, bu mêtê dau meñ akêtñ mac nem ñalôm akwa, nañ kac mac tu asa lêtñ atac whiñ gêñ nom-nga-nga.

² Gêñ nañ mac atac whiñ, nañ mac atap sa dom, ñahu bu mac atetñ têtñ Anötö dom. Mac tamgatu gêñ dau ñapañ e mac atac ñandê sa ti asôm daôm, ma mac oc akôm mwasac e nditôm bu andic ñamalac ndu. Magoc mac atôm dom bu akôc gêñ nañ mac atac whiñ.

³ Ma têtñ ñatô mac atetñ gêñ têtñ Anötö, magoc iñ kêtñ têtñ mac dom. Mac atap sa dom, ñahu bu mac atetñ gêñ dau tu bu amwasinç daôm-nga ñambwa, ma gauc dinañ iñ solop dom.

⁴ Mac atôm lau mockaiŋ-ŋga, bu mac ahu Anötö siŋ ma asap gêŋ nom-ŋga dôŋ. Mac aŋgô! Asa naŋ tac whiŋ gêŋ nom-ŋga hôc gêlêc, naŋ Anötö ndê silip dom, iŋ Anötö ndê ŋacyo. ⁵ Anötö ndê yom naŋ sêto yêc, naŋ whê sa bu Ŋalau naŋ Anötö kêŋ mbo yac neŋ ŋalôm, naŋ gêm lêmuŋ yac neŋ gatun ma tac whiŋ ŋandô bu dasar iŋ dôŋ ŋapaŋ. Gauc nem yom dau ŋapep, bu iŋ yom ŋambwa dom. ⁶ Anötö kêŋ ndê mwasiŋ têŋ yac tu bu puc yac dôŋ pi lêŋ sac-ŋga. Tu dinaŋ-ŋga sêto yom yêc bocdec bu:

Anötö kêgwiniŋ lau naŋ sêtoc dau sa, magoc kêmwasiŋ lau naŋ sêŋgwiniŋ dau. [*Prov 3:34*]

⁷ Bocdinaŋ asôc Anötö ŋapu. Apuc daôm dôŋ têŋ Sadaŋ bu êntôm mac dom. Amasuc iŋ su ma iŋ oc lhö su yêc mac. ⁸ Atigasuc Anötö dec iŋ oc tigasuc mac. Mac lau naŋ akôm mêtê sac, naŋ aŋgwasiŋ amam ma ahu mêtê dau siŋ. Ma mac lau naŋ aŋkuc Anötö ti gauc lu-lu, naŋ amasaŋ nem ŋalôm ŋawasi sa. ⁹ Anem daôm kwi ma ataŋ tu mac nem sac-ŋga. Mac nem mbwac nem dau kwi ti daŋgibo, ma mac nem atac ŋayham nem dau kwi ti atac ŋawapac. ¹⁰ Aŋgwiniŋ daôm yêc Pômdau aŋgô-ŋga, goc iŋ oc toc mac sa.

Aŋgôliŋ yom pi nem asidôwai dom

¹¹ O asidôwai, aŋgôliŋ yom pi daôm dom. Asa naŋ gêm dôhôn dau pi ndê asidôwa daŋ, naŋ gêlic asidôwa dau sac ma sôm yom pu iŋ-ŋga, naŋ pu yomsu ma gêlic yomsu dau sac

whiŋ.* Ma am bu pu yomsu, dec am sôc yomsu dau ŋapu dom. ¹² Anötö naŋ kêŋ yomsu, naŋ ndê ŋaclai yêc bu nem lau si, me seŋ ŋac su. Ma iŋ tawasê oc êŋsahê lau hoŋ pi ŋac si mêtê. Bocdinaŋ am asa dec gauc gêm bu êmsahê nem asidôwai?

Datoc dauŋ sa dom

¹³ Aö wasôm yom pi lau naŋ gauc gêm bu sêti ŋadau dau. Mboe ŋamalac dau oc sôm yom bu, “Kwahic dec me laŋsê, aö watêŋ malac atu dau wandi, wanem gwelêŋ nditôm yala dau sambuc, ma watap mone daêsam sa.” ¹⁴ Mac atôm dom bu aŋyalê gêŋ naŋ oc hôc asê têŋ laŋsê. Mac alic nem têm ambo tamli-ŋga bu iŋ gêŋ atu, a? Mba! Iŋ gitôm yawalec naŋ puc pi meŋ magoc ŋasawa sauŋ eŋ hê su. ¹⁵ Gauc nem bu ati ŋadau tu amasaŋ daôm nem lêŋ asa-ŋga dom, magoc asôm yom bocdec bu, “Pômdu bu lic ŋayham, dec yac oc ambo taŋli ma akôm gêŋ bocdec me gêŋ bocdê.” ¹⁶ Magoc mac lau wachuc naŋ êlêmé atoc daôm sa, ma mac nem mêtê dau iŋ mêtê sac. ¹⁷ Bocdinaŋ asa naŋ kêyalê lêŋ ŋayham magoc kôm dom, naŋ kôm sac.

5

Jems kêŋ puc lau ti lêlôm

* **4:11** Lau atu-tu gauc gêm bu Jems kôc gauc pi yomsu tigeŋ bu ‘Atac whiŋ nem asidôwai tôm am tac whiŋ daôm,’ dec to yom dinaŋ. Yomsu dau yêc Lev 19:18; ma Jem 2:8.

¹ Mac lau ti lélôm nañ ac mone ti wapa daêsam sa, nañ aṅgô! Apuc daṅgibo sa ma atañ pi ṅawapac nañ gic waê bu tap mac sa têtj bêc ṅambu-ṅga. ² Awa ti wapa ma ṅakwê nañ mac ac sa tu daôm-ṅga, nañ hôt gêlêc su ma yêc ṅambwa e da nôm ma sop seṅ su. ³ Oyaê! Bêc ṅambu-ṅga meṅ kêpiṅ su, magoc mac akôm bu andic nem awa silba ma gol sa ṅapaṅ. Mac oc atap matôt sa tu mac nem awa nañ hêko wêmbwa e da nôm su. Ma tu gêtj dinaṅ-ṅga dec mac nem ṅamsôm oc tisac whiṅ, gitôm ya gêtj mac. ⁴ Aṅgô! Mac aṅgamiṅ ṅaôli ṅayham têtj lau nañ sêkôm gweleṅ têtj mac. Ma Pômdau ṅaclai ṅadau ṅgô ṅawaê ma oc êmatôt mac pi gêtj dau. ⁵ Mac ambo nom ti amwasij daôm kêlêc, atôm bôt nañ seṅ gêtj ṅawahô e sêtôp atu, ma sêṅyalê dom bu ṅasawa sauṅ ṅac si ṅadaui oc sêndic ṅac ndu ma sêneṅ. ⁶ Mac êlêlê amatôt lau gitêtj ma akic yom bu andic ṅac ndu, magoc lau dau sêkêṅ kisa mac dom.

Dahôt ṅawapac ti atac pa su

⁷ Bocdinaṅ asidôwai, ahôtj Pômdau ndê bêc mbu meṅ-ṅga ti nem atac pa su. Lau nañ sêsô gêtj sip ôm, nañ sêhôtj gêtj dau bu nem ṅandô. Sêmbo ti atac pa su ma sêhôtj u bu ndic ma ac bu pi tôm ṅandoc. ⁸ Ma mac bocdinaṅ. Ndoc meṅ kêpiṅ bu Pômdau oc mbu meṅ, dec apuc daôm dôṅ bu alhac ṅaṅga, ma ahôtj iṅ ti nem atac pa su.

⁹ O asidôwai, asec daôm dom. Mac bu asec daôm, dec oc atap Anötö ndê matôt sa, bu iṅ

ndê bêc êmatôc lau-nga meŋ kêpiŋ, gitôm iŋ dau meŋ kalhac mac nem andu ŋagatam.

¹⁰ Asidôwai, akôc gauc pi propet akwa-kwa. Ŋac sêhóc ŋawapac daêsam, magoc sêhoc yom asê sem Pômdau aŋgô ti atac pa su. Gauc nem ŋac si lêŋ dinaŋ ma aŋkuc. ¹¹ Lau naŋ sêhóc ŋawapac ti atac pa su, naŋ yac tampiŋ ŋac. Mac aŋgô miŋ pi Job, naŋ hóc ŋawapac daêsam, magoc gêŋ dau ku iŋ dulu dom, iŋ kalhac ŋaŋga. Ma mac aŋyalê bu tiŋambu Pômdau gêm iŋ sa tiyham. Yomandô! Pômdau iŋ tawalô yac ma atac apu yac ŋandô.

¹² O aneŋ asidôwai, ayob daôm tu gêŋ atu dindec-nga. Mac bu akôm gêŋ daŋ, dec asôm, "Aêc," ma yom dau gitôm. Mac bu akôm dom, dec asôm, "Mba," ma mac nem yom dau gitôm. Atôc amam pi undambê me pi nom me pi gêŋ daŋ tu bu andic seŋeŋ nem yom-nga dom. Mac bu akôm bocdinaŋ, dec oc atap Anötö ndê matôc sa.

Yom dateŋ mbec-nga

¹³ Mac nem asa bu tap ŋawapac sa, naŋ teŋ mbec. Ma mac nem asa naŋ atac ŋayham sa, naŋ nem wê ma êmpiŋ Pômdau. ¹⁴ Mac nem asa bu gêm bac, naŋ kêŋ yom têŋ gôlôwac dabuŋ si lau bata sêmeŋ, ma sêteŋ mbec tu iŋ-nga ma sêmbac ndip kwi pi iŋ ŋagôlôn sênem Pômdau aŋgô. ¹⁵ Mbec naŋ mac ateŋ ti akêŋ whiŋ, naŋ oc nem ŋamalac gêm bac dau sa. Pômdau oc nem iŋ sa ma kôm iŋ ŋayham sa tiyham. Ma iŋ ndê sac bu yêc, goc teŋ mbec tu gêŋ dau-nga whiŋ, ma Pômdau oc

suc kwi. ¹⁶ Bocdinaŋ asa naŋ kôm sac, naŋ hoc ŋayom asê têŋ asidôwa daŋ, ma asidôwa dau teŋ mbec tu iŋ-ŋga. Akôm bocdinaŋ, ma ateŋ mbec pi mac nem asidôwai naŋ gêmbac, bu akôm ŋac ŋayham sa tiyham. Mbec naŋ ŋamalac gitêŋ daŋ teŋ, naŋ mbec ti ŋaclai, ma oc nem ŋandô. ¹⁷ Gauc nem propet Elaija. Iŋ ŋamalac gitôm yac. Iŋ teŋ mbec bu u ndic dom, dec u gic dom gitôm yala tō ma ayô 6. ¹⁸ Goc iŋ teŋ mbec tiyham, dec Anötö kêŋ u gic ma gêŋ ôm-ŋga sem ŋandô tiyham.

Danem lau naŋ sêhu Anötö ndê lêŋ siŋ, naŋ sa

¹⁹ Aneŋ asidôwai. Mac nem daŋ bu hu Anötö ndê lêŋ ti yom ŋandô siŋ, ma daŋ bu nem iŋ ndê ŋalôm kwi ma kôc iŋ mbu meŋ tiyham, ²⁰ dec aŋyalê gêŋ bocdec. Asa naŋ gêm ŋamalac sac kwi bu hu mêtê sac siŋ, naŋ kêgaho iŋ su yêc seŋ mbac ndu-ŋga, ma gêm iŋ sa bu tap ŋagêyô sa tu iŋ ndê sac daêsam-ŋga dom.

Anötö ndê Yom Lêñsêm Wakuc
Bugawac: Anötö ndê Yom Lêñsêm Wakuc New
Testament

copyright © 2013 Lutheran Bible Translators Australia

Language: Bugawac

Contributor: Wycliffe Bible Translators, Inc.

All rights reserved.

2020-11-11

PDF generated using Haiola and XeLaTeX on 21 Sep 2022 from source files dated 17 May 2022

1dcc5a6c-3c1e-54e8-aa77-af18a3782048